

12 AUG 1997

Mahathir-Menara

DR MAHATHIR RASMI MENARA ALOR SETAR KHAMIS INI

ALOR SETAR, 12 Ogos (Bernama) -- Perdana Menteri Datuk Seri Dr Mahathir Mohamad akan merasmikan Menara Alor Setar, menara kedua tertinggi di negara ini semasa lawatan kerja sehari ke Kedah, Khamis ini.

Upacara perasmian menara ke-13 tertinggi di dunia yang dimiliki oleh Telekom Malaysia itu akan turut dihadiri Menteri Tenaga, Telekom dan Pos Datuk Leo Moggie.

Menurut kenyataan yang dikeluarkan Bahagian Perhubungan Korporat Telekom, menara telekomunikasi terletak di Lebuhraya Darul Aman, di sini dengan ketinggian mencecah 165.5 meter itu merupakan mercu tanda bagi bandar Alor Setar.

Menara yang dianggap 'adik' Menara Kuala Lumpur itu mula dibina pada 1994 dan dibuka kepada orang ramai mulai Februari lepas. Dari ruang pemerhati yang terletak di aras 88, orang ramai dapat melihat kehijauan bandar Alor Setar yang dikelilingi sawah padi dan menyaksikan pemandangan sehingga ke Selat Melaka.

Selain merasmikan menara itu, Dr Mahathir mempunyai aturcara ketat sepanjang lawatan itu.

Menteri Besar Tan Sri Sanusi Junid berkata, Perdana Menteri dijadualkan melawat Rumah Rakan Kedah di Jalan Sultanah yang dijadikan pusat media dan kemudiannya melawat bangunan baru Muzium Negeri, di sini yang baru siap dibina.

Pada tengah hari, beliau akan meninjau projek pembinaan Tangga Kenari-Seribu Tahun di Gunung Jerai diikuti jamuan bersama penduduk di daerah Yan, katanya.

Projek Tangga Kenari-Seribu Tahun adalah pembinaan lebih 10,000 anak tangga dari kaki Gunung Jerai yang bermula di Titi Hayun, Yan sehingga ke puncaknya.

Kini, lebih 400 anak tangga telah dibina dan apabila siap kelak bakal mencatatkan rekod dunia sebagai bilangan anak tangga yang terbanyak.

Sebelum petang, Dr Mahathir akan melawat daerah Kubang Pasu serta bermesra dengan penduduk-penduduk di situ pada Majlis Pemimpin Bersama Rakyat, di Dewan Jitra. -- BERNAMA

MN NMO